

Codex Laureshamensis Teil: Bd. 1, Einleitung, Regesten, Chronik Nr. 158

In nomine dei omnipotentis. Heinricus divina misericordia laureshamensis abbas, universis Christi fidelibus, futuris ac presentibus, in perpetuum. Ad hoc a principe pastorum et patre misericordiarum deo in dispensationem familiae suae misericorditer vocati sumus, ut servis suis conservis nostris ex caritatis affectu serviamus, et sufficientia nostra quae ex ipso est, eorum indigentiae pro posse consulamus. Ea propter noverit universitas Christi fidelium, ad presens et inposterum, qualiter nos divinae remunerationis intuitu, fratrumque ac fidelium nostrorum precibus et consultu, predium aecclesiae nostrae, videlicet octo huobas in Grensheim, Cuonrado de Hohenhart, et per ipsum Bliggero de Steinaha, ex antiquo beneficiatas, sed ab utroque nobis absolute resignatas, venerabilibus fratribus nostris in Sconaugia iure hereditario sub annua pensione decem caseorum, habentium precium decem denariorum, perpetuo locavimus, prediumque Gagerensberg cum pertinentiis suis, a Bliggero, uxore, liberisque suis, aecclesiae nostrae proprietatis titulo huius rei gratia sollemnitate legitima traditum, predicto Cuonrado beneficii nomine concedentes, ipso eodem Bliggerum et filios suos revestiri fecimus. Huius itaque nostrae concessionis tenorem ne successorum nostrorum vel inclementia rescindat vel auctoritas, eatenus ipsum lance dispensatoria moderati sumus, ut et servorum dei commodis prospiceremus per caritatis officium, et aecclesia nostra in nullo pateretur vel detrimenti vel alienationis preiudicium. De cetero statuentes, et auctoritate dei omnipotentis et nostra confirmantes, ne quis eos seu de familia, seu de ministerialibus aecclesiae nostrae, nulla denique qualiscumque persona, tamquam a nobis accepto utens officio vel potestate in hac ipsa a nobis concessa hereditate, exactionibus, oppressionibus, seu quibuscumque molestiis predictos fratres infestare seu perturbare presumat, sed sub hac quam prediximus annua et memoriali pensione eandem hereditatem libere teneant, excolant, et possideant. Verum ut huius nostrae concessionis et constitutionis integritas per futura temporum curricula rata et inconvulsa permaneat, cartam hanc exinde conscriptam, sigilli nostri impressione roboravimus, atque illustrium et spectabilium personarum in quorum presentia et sententia hec acta sunt testimonio confirmavimus. Quorum hec sunt nomina. De clero: Cuonradus wormaciensis episcopus. Cuonradus custos de Winphina. De liberis: Cuonradus de Hohenhart, et filius eius Cuonradus, Waltherus de Husen, Billungus de Lindenvels, Cuonradus de Hirzberg, Bliggerus de Steinaha, et filii eius Bliggerus et Cuonradus, Gerhardus de Scowenburc, Rudolfus de Kiselowa, Ruthardus de Crûtheim, Erpho de Hirzberg. De ministerialibus: Wernherus de Wormatia, Ingram et Rumhardus de Hantscuhesheim, et ceteri quam plures. Acta sunt hec Hantscuesheim. Anno dominicae incarnationis MoCoLXoVo. Indictione XIIIa. Imperii vero gloriosi domni nostri imperatoris Friderici anno XIIIIo. Domni quoque Heinrici abbatis anno XIIIIo. Feliciter in Christo. Amen.

Item eisdem ab eodem in termino silvae pertinentis ad Virnheim data confirmatio.